

## BULGARIEN 2014- Schlussabend

Mariella, Du bisch en Hit  
mit Dim Charme risisch Du eus alli mit  
sälscht Panne nimmsch Du mit Humor  
Nur doch die chömed ja fascht gar nie vor

Nur wänn's grad abe seicht in Ströme  
ghört mer Dich es bitzli schtöhne  
simmer ehrlich: D'Pool Bar isch würkli kein Ersatz  
für Eusen Super-Terrasse- Platz

zwüsched Chinderschtüel und Flachbildschirm  
und Billardtisch und all dem Gschtürm  
häsch Du voll Dis Programm durezoge  
säge s'heg Schpass gmacht wär es bitzli gloge

drum simmer happy gsi wo's ghört hät räge  
und e paar Fraue mit badtüecher sind go d'Terrasse fäge  
zwar isches nid grad gsi e laui Summernacht  
doch hät's trotzdem det obe meh Spass gmacht

Die nächscht Alternative isch d'Turnhalle gsi  
die isch dänn würkli nid grad chli  
da isches schwierig gsi, z'erkläre  
i weli Richtig mir eus sötted chere

Ich sägs namal, Du bisch en Hit  
mit Riesegeduld lernsch Du eus neuu Schritt  
dass bi dem Pensum mal acht Counts vergässe gönd  
isch öpis wo mir nur allzu guet verschtönd

Wänn mir d'Schritt im Prinzip chönd, fang'ts erscht aa  
es hät chum en Tanz kein Restart gha  
de Schulter-Jimmy häsch Du voll im Bluet  
gäll, das Schüttle gfallt dir chaibe guet?

Nebed em Tanze organisiersch Du Wasser, Jeep und Car  
au Step Sheets und mis Handy, Du bisch so wunderbar  
Wie Du das schaffsch, mir chönd nur schtune  
und das immer mit de beschte Lune

D'Fahrt nach Nessebar isch än richtige "Joyride" gsi  
mit Dir als Tourguide gaht die Fahrt sehr schnäll verbi  
Du häsch verzellt über Land und Lüt  
vo Bulgarie geschter und vo Bulgarie hüt

Statt "follow your arrow" folged mir Dir und Dine Worte  
während Du versuechsch Dini handgschribne Notize z'ordne  
Wänn Du erchlärst und s'Mikrofon macht so Tönli  
seisch Du churzerhand s'chäm vo de Böhnli

Du bisch es wo d'Ferie für eus so super macht  
mir lärned , tanzed und händ jede Tag vill glacht  
dini Sprüch und dini positivi Art  
sind wüerkli rüerend "in my heart"

Au "Sailor Boy" und "Jacket Joe"  
mached Härz und Füessli froh  
ja guet, bi de Füessli chas au andersch si  
doch dänn schmiered mer ächli Salbi ii

Es gieng sicher vills nid so guet ohni de Schatz  
d'Esther hät in dem Zweierteam en wichtige Platz  
ab Morn isches dänn ändli wieder so wyt  
dänn händ ihr für Eu wieder meh Zyt

Ab Morn gits "dancing in the moonlight" nach em Abig-Ässe  
und alli "bruises" sind dänn gli vergässe  
Im Prinzip macht jedi wieder was sie wott  
und villicht gits na Zyt für "feeling hot"

Mir müend Morn hei, händ s'Meer aber na chum gseh  
defür d'Schue- und d'Chleider Läde umso meh  
fürs Meer müend mir - Du ahn'sch es scho -  
eifach s'nächtscht Jahr wieder cho

Für eus Fraue isch es sunneklar  
weil Ihr sind so wunderbar  
und weil Ihr sind en Riesehit  
chömed mir s'nächtscht Jahr wieder mit

Für hütt blibt nur na, tusig Mal "danke" z'säge  
Dich z'känne isch wüerkli e Bericherig fürs Läbe  
drum Danke für die schöni Zyt  
zum letschte Mal DU BISCH EN HIT